



NOTULE VAN 'N VERGADERING VAN DIE UITVOERENDE BURGEMEESTERSKOMITEE GEHOU IN DIE STADSAAL, MALMESBURY OP WOENSDAG, 13 JULIE 2022 OM 10:00

TEENWOORDIG:

Uitvoerende Burgemeester, rdh J H Cleophas (voorsitter)
Uitvoerende Onderburgemeester, rdl J M de Beer

Lede van die Burgemeesterskomitee:

Rdl D G Bess
Rdh T van Essen
Rdl A K Warnick

Ander raadslede:

Rdh M A Rangasamy (Speaker)

Beampes:

Munisipale Bestuurder, mnr J J Scholtz
Direkteur: Finansiële Dienste, mnr M A C Bolton
Direkteur: Siviele Ingenieursdienste, mnr L D Zikmann
Direkteur: Beskermingsdienste, mnr P A C Humphreys
Direkteur: Ontwikkelingsdienste, me J S Krieger
Direkteur: Korporatiewe Dienste, me M S Terblanche

1. OPENING

Die voorsitter verwelkom lede en open die vergadering.

2. VERLOF TOT AFWESIGHEID

BESLUIT dat verlof tot afwesigheid verleen word aan rdl N Smit en die Direkteur: Elektriese Ingenieursdienste, mnr R du Toit.

3. VORLEGGINGS/AFVAARDIGINGS/SPREEKBEURTE

Geen.

4. NOTULES

4.1 NOTULE VAN 'N GEWONE UITVOERENDE BURGEMEESTERSKOMITEE-VERGADERING GEHOU OP 15 JUNIE 2022

BESLUIT

(op voorstel van rdh T van Essen, gesekondeer deur rdl A K Warnick)

Dat die notule van 'n Gewone Uitvoerende Burgemeesterskomiteevergadering gehou op 15 Junie 2022 goedgekeur en deur die Uitvoerende Burgemeester onderteken word.

4.2 NOTULE VAN 'N SPESIALE UITVOERENDE BURGEMEESTERSKOMITEE-VERGADERING GEHOU OP 22 JUNIE 2022

Besluit/...

4.2/...

BESLUIT

(op voorstel van rdl A K Warnick, gesekondeer deur rdl T van Essen)

Dat die notule van 'n Spesiale Uitvoerende Burgemeesterskomiteevergadering gehou op 22 Junie 2022 goedgekeur en deur die Uitvoerende Burgemeester onderteken word.

5. SAKE VOORTSPRUITEND UIT DIE NOTULES

Geen.

6. MAANDVERSLAG: MEI 2022

[Nota: Die prestasie- en finansiële inligting t.o.v. Kwartaal 4 word ingesluit in die artikel 52 MFMA-verslag wat op 28 Julie 2022 aan die Raad voorgelê sal word, vandaar die voorlegging van slegs addisionele verslae soos van toepassing op die betrokke direktorate.]

6.1 SIVIELE INGENIEURSDIENSTE (7/1/2/2-4)

Die Direkteur: Siviele Ingenieursdienste wys daarop dat die hoë waterverbruik vir Mei 'n kommerwekkende uitskieter is sedert die droogte. Die Munisipaliteit betree verder 'n periode van potensiële falings van sy grootmaatwaterinfrastruktuur, wat daadwerklike beplanning oor die volgende tien tot 15 jaar noodsaak.

Die Direkteur: Siviele Ingenieursdienste meld ook dat die Departement Waterwese se versuim om die waterprobleem aan te spreek, vereis dat alternatiewe waterbronne desnoods deur die Munisipaliteit ondersoek sal moet word, om onder meer die toename in verbruikers en ekonomiese groei te akkommodeer. Daar is ook kommer dat die Bergrivier-projek, wat addisionele kapasiteit/toevoer vir die Munisipaliteit sou skep, nie gaan realiseer nie, hoofsaaklik weens die onbekostigbaarheid daarvan vir die landbouers wat tot die lening sal moet bydra.

Die Burgemeester, raadsheer van Essen en die Munisipale Bestuurder spreek insgelyks hul kommer oor die kwessie uit, onder andere ook met verwysing na die situasie te Chatsworth en Riverlands, en word vervolgens

BESLUIT

- (a) Dat kennis geneem word van die inhoud van die maadverslag van die Direkoraat: Siviele Ingenieursdienste ten opsigte van Mei 2022;
- (b) Dat die daarstel van indikatore om watersekuriteit vir die Swartland in die langtermyn te verseker, verwys word vir oorweging as deel van die GOP-proses.

6.2 ELEKTRIESE INGENIEURSDIENSTE (7/1/2/2-6)

Raadsheer van Essen spreek sy kommer uit oor die kragverbruik in sekere gebiede, soos Malmesbury, met verwysing na die Klipkoppie-skakeltuig wat reeds 21 jaar oud is, en wat die risiko loop van faling as gevolg van gereelde beurtkrag. Hy voorsien 'n groter impak op elektrisiteitsvoorsiening aan die dorp indien SASKO (as gevolg van 'load curtailment') van beurtkrag uitgesluit sou word. Raadsheer van Essen noem verder dat verbruikers weerstandig begin raak oor die betaling van beskikbaarheidsgelde.

BESLUIT dat kennis geneem word van die inhoud van die maandverslag van die Direkoraat Elektriese Ingenieursdienste ten opsigte van Mei 2022.

6.3 ONTWIKKELINGSDIENSTE (7/1/2/2-5)

Die Direkteur: Ontwikkelingsdienste meld dat daar reeds 102 huise in die De Hoop-projek oorhandig is, en dat die kontrakteur (*Simply Do*) aangedui het dat Fase 1 (395 strukture) teen die einde van die jaar afgehandel sal wees. Sy noem verder dat daar teen 21 Julie 2022 aan die Darling *Action Group* terugvoering gegee moet word rakende grond vir 'n skool en die skep van gedienste erwe.

6.3/...

Met verwysing na die appèlverhoor ten aansien van erf 1192, Yzerfontein, spreek die Burgemeester sy kommer uit dat daar klaarblyklik nie boetes gehef word vir ongemagtigde bouwerk nie. Die Munisipale Bestuurder en Direkteur: Ontwikkelingsdienste dui egter aan dat dit wel die geval is dat boetes gehef word, en onderneem om terugvoering aan die komitee te gee in hierdie verband.

BESLUIT

- (a) Dat kennis geneem word van die inhoud van die maandverslag van die Direkoraat Ontwikkelingsdienste ten opsigte van Mei 2022;
- (b) Dat daar aan die komitee terugvoering gegee sal word oor die hef van boetes vir ongemagtigde bouwerk.

6.4 BESKERMINGSDIENSTE (7/1/2/2-3)

6.4.1 VERKEER- EN WETSTOEPASSINGSDIENS

6.4.2 BRANDWEERDIENSTE

Die Direkteur: Beskermingsdienste noem dat die opleiding van die reaksie-eenheid goed verloop, en teen 29 Julie 2022 afgehandel sal wees. Die twee senior verkeersbeamptes in beheer van die eenheid, deurloop ook die opleiding by die *Chrysalis Academy*.

Hy meld verder dat die honde-eenheid ook uitstekend vaar, en hul dienste ook deur ander munisipaliteite benut word.

Raadslede spreek hul kommer uit oor die spesifieke uitdagings wat die direkteur uitlig, synde onwettige storting, grondgrype en '*speeding/dicing*', lg. synde veral in Darling 'n probleem. Die Direkteur: Beskermingsdienste meld dat Stad Kaapstad se konsep verkeersverordening geraadpleeg sal word om vas te stel hoe die Stad 'n kwessie soos '*dicing*' hanteer, wat potensieel inhou dat voertuie geskut of lisensies ontnem mag word.

Kennis word geneem dat daar selde boetes uitgereik word vir die ongemagtigde storting van vullis, omdat oortreders op heterdaad betrap moet word, en mense nie geneë is om oortreders aan te gee nie, weens potensiële viktimisasie.

BESLUIT

- (a) Dat kennis geneem word van die inhoud van die maandverslag van die Direkoraat Beskermingsdienste ten opsigte van Mei 2022;
- (b) Dat daar as deel van die GOP-proses oorweeg sal word om indikatore te stel vir die skryf van boetes vir onwettige storting.

7. NUWE SAKE

7.1 HERAANNEMING VAN DIE MUNISIPALE RUIMTELIKE ONTWIKKELING-RAAMWERK (MSDF) AS DEEL VAN DIE GOP (2/1/4/4/1)

Die Ruimtelike Ontwikkelingsraamwerk (ROR) is op 30 Mei 2019 deur die voormalige Raad aanvaar en sedertdien is daar geen wysigings aan die ROR aangebring nie. Die ROR vorm 'n integrale deel van die Geïntegreerde Ontwikkelingsplan (GOP) en derhalwe is 'n opsomming daarvan vervat in die GOP soos goedgekeur deur die Raad op 26 Mei 2022.

Die GOP is voorsien aan die Minister van Plaaslike Regering en het lg. versoek dat die ROR heraangeneem word, aangesien slegs die opsomming daarvan in die GOP as onvoldoende beskou word.

BESLUIT (vir voorlegging aan die Raad op 28 Julie 2022)

(op voorstel van rdh T van Essen, gesekondeer deur rdl A K Warnick)

Dat die Munisipale/...

7.1/...

Dat die Munisipale Ruimtelike Ontwikkelingsraamwerk wat op 30 Mei 2019 deur die Raad aanvaar is en waarvan 'n opsomming by die huidige GOP (Hoofstuk 6, paragraaf 6.4) ingesluit is, by die Raad aanbeveel word vir heraanname.

7.2 AANVAARDING VAN VERORDENING INSAKE DIE HOU VAN VERGADERINGS (1/1)

Die konsep Verordening insake die Hou van Vergaderings is op 26 Mei 2022 aan die Raad voorgelê vir doeleindes om die publieke deelnameproses te deurloop.

Daar is geen kommentaar/insette ontvang teen die sperdatum van 1 Julie 2022 nie.

BESLUIT (vir oorweging deur die Raad op 28 Julie 2022)
(op voorstel van rdl A K Warnick, gesekondeer deur rdl D G Bess)

- (a) Dat die volgende verordening aanbeveel word vir goedkeuring deur die Raad, om in werking te tree op datum van afkondiging in die Provinsiale Koerant:
 - Swartland Munisipaliteit: Verordening insake die Hou van Vergaderings
- (b) Dat boetes vir oortredings van die verordening vasgestel word deur die Departement van Justisie;
- (c) Dat die Reëls vir Virtuele Vergaderings wat as aanvullend tot die bestaande verordening aangeneem was, herroep word vanaf datum van afkondiging van die nuwe verordening.

7.3 AANSTELLING VAN DISSIPLINÊRE PANEEL WAT AAN DIE RAAD AANBEVEEL WORD (5/15/1/5)

Die Dissiplinêre Raad is ingestel as 'n onafhanklike adviserende liggaam om ingevolge die *Financial Misconduct Regulations* die Raad by te staan in ondersoek na finansiële wangedrag.

Die Munisipale Bestuurder noem dat die verslag slegs beoog om die nuwe Interne Ouditeur op die Dissiplinêre Raad aan te stel, en dat 'n verslag mettertyd aan die komitee voorgehou sal word rakende die ander lede wie se aanstellingstermyne op 31 Desember 2022 verstryk.

BESLUIT
(op voorstel van rdh T van Essen, gesekondeer deur rdl A K Warnick)

- (a) Dat paragraaf 4(3) van die *Financial Misconduct Regulations* bepaal dat die ampstermyne van lede van die Dissiplinêre Raad nie 'n termyn van drie jaar mag oorskry nie en dat die Uitvoerende Burgemeesterskomitee, met in ag neming van die kommentaar in paragraaf 3 van die verslag, die volgende goedkeuring verleen ten einde kontinuïteit in die bestaan van die Dissiplinêre Raad te verseker:
 - (i) Die aanstelling van Me J Erasmus, Bestuurder Interne Oudit vanaf 1 Junie 2022 tot 31 Mei 2025.

7.4 VERGOEDING VAN DIE LEDE VAN DIE MUNISIPALE PRESTASIE- EN RISIKO OUDITKOMITEE (5/15/1/3)

Die Prestasie- en Risiko Ouditkomitee speel 'n belangrike oorsigrol en lewer 'n gespesialiseerde diens aan die Munisipaliteit as adviserende liggaam t.o.v. finansiële-, risiko- en prestasiebestuur.

BESLUIT
(op voorstel van rdh T van Essen, gesekondeer deur rdl A K Warnick)

- (a) Uurlikse tarief:
 - (i) Dat die vergoeding betaalbaar aan die lede van die Prestasie- en Risiko Ouditkomitee vanaf 1 Julie 2022 vir die voorbereiding en bywoning van ouditkomiteevergaderings of vergaderings van die Raad, goedgekeur word, soos volg:

7.4(a)/...

- Voorsitter: R820.00 per uur (maksimum van 8 ure)
 - Lede: R700.00 per uur (maksimum van 7 ure)
- (ii) Dat die maksimum ure per vergadering die bywoning, voorbereiding, navorsing en reistyd na en van die lokaal waar die vergaderings gehou word insluit;
- (iii) Dat goedkeuring verleen word dat die bogenoemde uurlikse tariewe voortaan jaarliks vanaf 1 Julie verhoog met die persentasie-aanpassing van 5% bereken op die tarief betaalbaar aan die lede (nie Voorsitter) afgerond tot die naaste R5.00, d.w.s. 5% van R700 = R35 afgerond na R35. Dus die Voorsitter se uurlikse tarief sal in 2023/24 verander na R820 + R35 = R855 en ander lede R700 + R35 = R735. In 2024/25 sal lede se uurlikse tarief verhoog van R735 + 5% = R771.25 afgerond na R770, dus R770. Die Voorsitter se tarief verhoog van R855 + R35 = R890;
- (b) Aantal vergaderings:
- (i) Dat kennis geneem word dat 'n minimum van vier vergaderings per jaar belê sal word, waarvan twee van die vergaderings Prestasiebestuur sal insluit en ander twee Risikobestuur. Addisionele vergaderings wat belê word sal in oorleg met die Munisipale Bestuurder geskied ten einde die uitgawe in hierdie verband te kontroleer;
- (c) Reiskostes:
- (i) Dat kennis geneem word dat reiskostes betaal sal word ooreenkomstig die tarief soos voorgeskryf in die Reis- en Verblyfbeleid van die Munisipaliteit.

7.5 MENSLIKE HULPBRONNE PLAN VIR 2017-2022: UITBREIDING VAN DIE PLAN TOT 30 JUNIE 2023 (2/B)

Die Menslike Hulpbronne Plan is 'n strategiese dokument wat belyn is met verskeie strategieë van die Munisipaliteit en moet gevolglik saamloop met die termyn van die GOP.

BESLUIT

(op voorstel van rdl A K Warnick, gesekondeer deur rdl J M de Beer)

Dat goedkeuring verleen word vir die uitbreiding van die Menslike Hulpbronne Plan met 12 maande, eindigend 30 Junie 2023, om saam te loop van die bestaande GOP.

7.6 CAPENATURE: VOORGESTELDE MEMORANDUM VAN OOREENKOMS INSAKE ONWETTIGE GRONDBESSETTING (1/1)

CapeNature het die Munisipaliteit genader om bystand te verleen in die voorkoming van en spoedige reaksie op onwettige besetting van grond wat deur *CapeNature* bestuur word. Die voorgestelde Memorandum van Ooreenkoms is met die sakelys gesirkuleer.

Raadslede spreek hul steun uit vir die voorgestelde ooreenkoms, maar versoek dat die inhoud (met spesifieke verwysing na klousules 6.1.7, 6.1.7 en 6.1.8) na behore nagegaan sal word om te verseker dat die Munisipaliteit hom nie verpligtinge op die hals haal wat by die eienaar van die grond berus nie, en om te verseker dat die Munisipaliteit genoeg magte het om te mag optree wanneer dit nodig blyk.

Die Direkteur: Finansiële Dienste doen aan die hand dat die ooreenkoms spesifiek moet boekstaaf dat die grond die eiendom van *CapeNature* is, en dat die aanspreeklikheid en verantwoordelikheid daarvoor by die instelling berus, en nie aan die Munisipaliteit opgedra word uit hoofde van die ooreenkoms nie.

BESLUIT

(op voorstel van rdl T van Essen, gesekondeer deur rdl A K Warnick)

- (a) Dat goedkeuring verleen word dat die voorgestelde Memorandum van Ooreenkoms met *CapeNature* aangegaan word rakende die onwettige besetting of okkupasie van grond, onderhewig daaraan dat die inhoud deur die Direkteur: Beskermingsdienste en Direkteur: Korporatiewe Dienste gefinaliseer sal word;

7.6/...

- (b) Dat die Munisipale Bestuurder gemagtig word om die finale ooreenkoms namens die Munisipaliteit te onderteken:
- (c) Dat kennis geneem word dat die uurtariewe ten aansien van wetstoepassingsdienste sal geld, soos jaarliks vasgestel deur die Raad.

7.7 RAAMWERK VIR DIE DE VLEI-AMFITEATER, DARLING (17/9/2/2/3)

Die De Vlei Amfiteater in Darling is gedurende 2020/2021 gebou en amptelik geopen op 19 Oktober 2021. Die doel van die Amfiteater is om 'n ruimte te skep waar gemeenskappe bymekaar kan kom om kuns, kultuur en optredes te geniet.

Sedert die opening was daar talle versoeke vanaf die publiek ontvang om van die interkulturele ruimte gebruik te maak.

Die Burgemeester spreek sy kommer uit dat gebruik van die amfiteater, weens die feit dat dit nie omhein is nie, mag ontaard in groter funksies wat beheer daarvoor binne die voorgestelde raamwerk mag kompliseer. Daar word egter kennis geneem dat die fasiliteite tot dusver nog met sukses bestuur kon word, en dat die situasie gemonitor sal word.

BESLUIT

(op voorstel van rdl A K Warnick, gesekondeer deur rdl D G Bess)

- (a) Dat die aangehegte raamwerk goedgekeur word wat die kriteria en aansoekproses ten opsigte van die gebruik van die De Vlei Amfiteater bevat, en dat dit jaarliks hersien word om te bepaal of die kriteria steeds van toepassing is;
- (b) Dat gebruiksaansoeke ook telkens aan die Direkoraat Beskermingsdienste voorgelê sal word om potensiële risiko's te bepaal en te kan bestuur, waar nodig in samewerking met die SAPD;
- (c) Dat die inhoud van die raamwerk op 'n bondige, positiewe wyse (sonder verwysing na enige strafmaatreëls) aan die gemeenskap gekommunikeer sal word.

7.8 AFSKRYWING VAN SKULD VAN DEERNISHUISHOUDINGS EN ANDER ONINVORDERBARE SKULDE, JUNIE 2022 – BEDRAG WERKLIK AFGESKRYF (5/7/3)

Die verslag het ten doel om die werklike bedrae afgeskryf aan die Uitvoerende Burgemeesterskomitee voor te lê nadat lopende heffings en/of rente by die afskrywingslyste van deernishuishoudings en ander oninvorderbare skulde bygewerk is, asook die afhandeling van sosio-ekonomiese ondersoeke.

Die Direkteur: Finansiële Dienste meld dat die afskrywings jaarliks nagenoeg R6,5 miljoen bedra, wat slegs sowat 0,8% beloop van die totale gehefde inkomste per jaar. Vergeleke met 'n buurmunisipaliteit waar afskrywings meer as 10% beloop, voorsien hy nie die risiko dat die situasie, gebaseer op die omvang van die huidige afskrywings, onvolhoubaar is nie.

BESLUIT

(op voorstel van rdl A K Warnick, gesekondeer deur rdl J M de Beer)

- (a) Dat kennis geneem word dat die bedrae wat werklik afgeskryf is ten opsigte van deernishuishoudings **R3 315 985,28** beloop en ten opsigte van ander oninvorderbare skulde **R63 263,47** beloop;
- (b) Dat kennis geneem word dat Swartland Munisipaliteit die reg voorbehou om enige bedrag wat afgeskryf is, weer terug te skryf na die betrokke debiteur en alle nodige stappe geneem sal word om die skuld in te vorder, indien dit vanaf datum van hierdie goedkeuring aan die lig kom dat:
 - (i) 'n huishouding nie aan die deerniskriteria voldoen het nie (soos bepaal in Hoofstuk 7 van die Deernisbeleid); of

7.8(b)/...

- (ii) 'n gedeelte van die skuld of die totale skuld van 'n debiteur nie korrek sou wees nie; of
 - (iii) enige inligting wat op datum van afskrywing nie aan die Uitvoerende Burgemeesterskomitee bekend was, wat daartoe sou lei dat die komitee die voorgelegde skuld nie vir afskrywing sou oorweeg nie;
- (c) Dat kennis geneem word dat indien 'n eiendom op welke wyse ookal vervreem sou word, Swartland Munisipaliteit die reg voorbehou om uitklaring op die betrokke eiendom te weerhou en die bedrae afgeskryf eers in te vorder, alvorens uitklaring op die betrokke eiendom gegee sal word. 'n Register is by die Eiendomsbelastingafdeling ingestel waarin gekontroleer word of daar ten opsigte van die betrokke uitklaring vir die voorafgaande twee jaar voor uitklaring, enige afskrywing was en dat indien wel, die afgeskryfde bedrag met die uitklaring verhaal word.

7.9 JAARVERSLAG INSAKE DIE IMPLEMENTERING VAN DIE VOORSIENINGKANAALBESTUURSBELEID VIR DIE FINANSIËLE JAAR EINDIGEND 30 JUNIE 2022 (8/1/B/1)

Regulasie 6(2)(a)(i) van die *Municipal Supply Chain Management Regulations* bepaal dat daar jaarliks 'n verslag aan die Raad voorgelê moet word aangaande die implementering van die Voorsieningskanaalbestuursbeleid.

Die jaarverslag vir die periode 1 Julie 2021 tot 30 Junie 2022 is met die sakelys gesirkuleer.

Raadslid Warnick versoek dat herhaalde afwykings, veral ten aansien van gevalle wat as 'onprakties' geïdentifiseer word, ondersoek moet word om moontlik onder die toepaslike tenderprosesse hanteer te word, en dat spesifikasies dienooreenkomstig aandag moet geniet.

Die Direkteur: Finansiële Dienste meld dat die verkrygingsregulasies baie spesifiek is hieraangaande, maar dat daar (binne die konteks van die Raad se oorsigrol) kennis geneem word van raadslid Warnick se verhoë, as synde 'n beroep op homself en die direkteure om die potensiële misbruik van die regulasies te voorkom. Hy noem verder dat die afwykings vir die jaar egter 'n baie klein persentasie vergestalt, vergeleke met die omvang van informele en formele tenders.

BESLUIT

(op voorstel van rdl A K Warnick, gesekondeer deur rdl D G Bess)

- (a) Dat kennis geneem word van die jaarverslag insake die implementering van die Voorsieningskanaalbestuursbeleid gedurende die 2021/2022 finansiële jaar ingevolge artikel 6(2)(a)(i) van die Regulasies, asook die verslae van die Formele Tenders (Aanhangsel A), Informele Tenders (Aanhangsel B) en die Afwykingsverslag (Aanhangsel C);
- (b) Dat verder kennis geneem word van die dienste gelewer vir die tydperk 1 April 2022 tot 30 Junie 2022 met verwysing na die uitsonderings waar dit onprakties was om die mark te toets en dus 'n afwyking van die verkrygingsprosesse ingevolge paragraaf 2(6) van die Voorsieningskanaalbestuursbeleid noodsaak het (Aanhangsel D). Kennis moet geneem word dat betalings nog in die 2021/2022 finansiële jaar gefinaliseer moet word en sal enige verskille ten opsigte van Kwartaal 4 ingevolge wetgewing in die volgende kwartaalverslag vermeld word, onderhewig aan die transaksies/syfers wat die volledigheid van die finansiële state mag beïnvloed.

7.10 UITSTAANDE DEBITEURE: JUNIE 2022 (5/7/1/1)

'n Volledige verslag van die stand van uitstaande debiteure is met die sakelys gesirkuleer.

Die Direkteur: Finansiële Dienste bevestig dat daar aan die komitee terugvoering gegee sal word indien die afskrywingsbedrag na jaarafsluiting sou wysig.

7.10/...

BESLUIT

(op voorstel van rdh T van Essen, gesekondeer deur rdl A K Warnick)

Dat kennis geneem word van die verslag aangaande die stand van Swartland Munisipaliteit se uitstaande debiteure vir Mei 2022.

7.11 VORDERING MET UITSTAANDE VERSEKERINGSEISE (5/14/3/5)

Ingevolge die Batebestuursbeleid moet maandeliks verslag gedoen word insake die uitstaande versekeringseise.

Die Direkteur: Finansiële Dienste bring onder die aandag van raadslede dat die geweldige verhoging in versekeringspremies te wyte is aan die addisionele bates wat bekom is en verseker moet word, waaronder infrastruktuur van meer as R600 miljoen en IT-infrastruktuur van sowat R7 miljoen. Hy is egter van mening dat die huidige versekeringsportefeulje steeds vir die Munisipaliteit voordelig is, en (nog) nie die skep van eie versekeringsreserwes regverdig nie. Hy maan opnuut dat daar met die nodige omsigtigheid deur personeel gehandel sal word met bates, waaronder voertuie.

Met betrekking tot die beveiliging van infrastruktuur, word genoem dat

- (1) die aard van die bate sal bepaal of 'n omheining weer aangebring sal word waar dit gevandaliseer of verwyder is;
- (2) die potensiële risiko's en kostes telkens 'n deurslaggewende rol speel wanneer bepaal word of daar van sekuriteitsmaatskappye gebruik gemaak moet word om infrastruktuur te beveilig, met verwysing na die voormalige Standard Bank-gebou waar die vervangingswaarde van gevandaliseerde bates (wat weer benut sou word) deurslaggewend was vir doeleindes van die versekeringseis, en nie die totale omvang van die skade nie.

BESLUIT

(op voorstel van rdh T van Essen, gesekondeer deur rdl A K Warnick)

- (a) Dat kennis geneem word van die stand van uitstaande versekeringseise tot en met 31 Mei 2022 soos met die sakelys gesirkuleer;
- (b) Dat die Direkteur: Beskermingsdienste die lys sal deurgee aan die Burgemeester van alle gevalle waar sekuriteitsreëlings in plek is, en wat dit behels.

7.12 GOEDKEURING VIR DIE PUBLIEKE DEELNAMEPROSES T.O.V. DIE 4DE GENERASIE KONSEP GEÏNTEGREERDE AFVALBESTUURSPLAN VIR PUBLIEKE EN DEA&OP KOMMENTAAR (16/4/B)

Die 3de Generasie Geïntegreerde Afvalbestuursplan is deur die voormalige Raad op 25 Mei 2017 ingevolge die bepalings van die *National Environmental Management: Waste Act, 2008 (Act 59 of 2008)* goedgekeur, onder andere, dat die plan elke vyf jaar hersien moet word.

Die konsep 4de Generasie Geïntegreerde Afvalbestuursplan is deur JPCE Raadgewende Ingenieurs opgestel en is 'n bestuursopsomming daarvan met die sakelys gesirkuleer.

BESLUIT

(op voorstel van rdh T van Essen, gesekondeer deur rdl D G Bess)

- (a) Dat kennis geneem word dat die Munisipaliteit in proses is om die 4de Generasie Geïntegreerde Afvalbestuursplan op te stel;
- (b) Dat goedkeuring verleen word dat die konsep 4de Generasie Geïntegreerde Afvalbestuursplan vir publieke deelname gepubliseer word vir kommentaar/insette vanaf die publiek en die Departement van Omgewingsake en Ontwikkelingsbeplanning;

(c)/...

7.12/...

- (c) Dat die 4de Generasie Geïntegreerde Afvalbestuursplan aan die Raad voorgelê word vir oorweging en goedkeuring, met in ag neming van die oorweging van kommentaar/insette ontvang tydens die publieke deelnameproses;
- (d) Dat daar oorweeg sal word om die inhoud van die afvalbestuursplan met raadslede te werkinkel, gegewe die belangrikheid daarvan.

7.13 AFWYKING VAN VOORGESKREWE VERKRYNGSPROSEDURES: AANSTELLING VAN 'N DIENSVERSKAFFER VIR OPLEIDING EN VERBLYF VAN DIE WETSTOEPASSING REAKSIE-EENHEID (8/1/B/2)

Die Munisipaliteit het befondsing ontvang om 'n Wetstoepassing Reaksie-eenheid op die been te bring en 20 beamptes is by wyse van 'n werwing- en keuringsproses vir hierdie doeleindes aangestel.

Stad Kaapstad se Metro-Polisie Opleidingsakademie en samewerking met *Chrysalis Academy* is die enigste diensverskaffer in die Wes-Kaap wat die toepaslike opleiding aan die betrokke beamptes kan aanbied.

BESLUIT

(op voorstel van rdl A K Warnick, gesekondeer deur rdl D G Bess)

- (a) Dat die Uitvoerende Burgemeesterskomitee kennis neem van die afwyking van die voorgeskrewe verkrygingsprosedures ingevolge klousule 36(2) van die Voorsieningkanaalbestuurbeleid;
- (b) Dat verder kennis geneem word van die aksie van die Munisipale Bestuurder om nie tenders uit te nooi nie, maar wel die kwotasie van *Chrysalis Academy* te aanvaar ten bedrae van R318 795,00 (BTW ingesluit) vir die opleiding en verblyf van amptenare van die Wetstoepassing Reaksie-Eenheid;
- (c) Dat die redes vir die afwyking van die voorgeskrewe verkrygingsproses soos volg aangeteken word:
 - (i) *Chrysalis Academy* is die enigste diensverskaffer in die Wes-Kaap wat die vereiste opleiding (ingesluit die verblyf) kan voorsien;
- (d) Dat die uitgawe ten bedrae van R318 795,00 (BTW ingesluit) teen posnommer: 9/233-490-852 verreken word en dat daar voldoende fondse beskikbaar is;
- (e) Dat die Bestuurder: Finansiële State in terme van die Voorsieningkanaalbestuursbeleid opdrag gegee word om bovermelde rede as nota by die finansiële state in te sluit, wanneer die betrokke state opgestel word.

7.14 AFWYKING VAN VOORGESKREWE VERKRYNGSPROSEDURES: VERKRYGING VAN HAELGEWEER RUBBERKOEËLS (8/1/B/2)

Die Swartland Verkeer- en Wetstoepassingsdienste het op 13 tot 17 Junie 2022 die SAPD bygestaan tydens die protesaksies op Darling.

Die optrede van die ±500 betogers was van so 'n aard dat traangas en rubberkoeëls gebruik is om orde te handhaaf en die ammunisie voorrade was nie voldoende nie.

BESLUIT

(op voorstel van rdl A K Warnick, gesekondeer deur rdl D G Bess)

- (a) Dat die Uitvoerende Burgemeesterskomitee kennis neem van die afwyking van die voorgeskrewe verkrygingsprosedures ingevolge klousule 36(2) van die Voorsieningkanaalbestuurbeleid;
- (b) Dat verder kennis geneem word van die aksie van die Munisipale Bestuurder om nie tenders uit te nooi nie, maar wel die kwotasie van *Brussels Gunstock Makers (Pty) Ltd* te aanvaar ten bedrae van R43 412,50 (BTW ingesluit) vir die verskaffing van rubberkoeëls aan die Verkeer- en Wetstoepassingdienste;

7.14/...

- (c) Dat die redes vir die afwyking van die voorgeskrewe verkrygingsproses soos volg aangeteken word:
 - (i) Die protesaksies was 'n noodsituasie met Verkeer- en Wetstoepassingsdienste se haelgeweer rubberkoeëls wat opgeraak het;
 - (ii) *Brussels Gunstock Makers (Pty) Ltd* was die enigste diensverskaffer wat op 'n publieke vakansiedag en gedurende die protesaksies die rubberkoeëls kon voorsien;
- (d) Dat die uitgawe ten bedrae van R43 412,50 (BTW ingesluit) teen posnommer: 9/233-1004-3473 in die 2021/2022 finansiële jaar verreken word en dat daar voldoende fondse beskikbaar is;
- (e) Dat die Bestuurder: Finansiële State in terme van die Voorsiening-kanaalbestuursbeleid opdrag gegee word om bovermelde rede as nota by die finansiële state in te sluit, wanneer die betrokke state opgestel word.

(GET) J H CLEOPHAS
UITVOERENDE BURGEMEESTER